

Dolomites y Unesco, responsabilté y competitivité

Tratan la scontreda sun les prospetives davertes dal reconesciment Unesco à l president Lorenzo Dellai envié la jent da remplazé la pouira y i cruzies con responsabilté y partezipazion

Cianacei - Chisc dis passés à la Union Autonomista Ladina metù a jì a Cianacei na scontreda sun les prospetives che se deura do l reconesciment dles Dolomites a Patrimone dl'Umanité.

Passa 200 persones à scuté con interes i reladours intervegnus, l president dla Provinzia autonoma de Trent Lorenzo Dellai, l assessour ai Enc Locai Mauro Gilmozzi e l architètl dl paesaje Cesare Micheletti. L jornalìst Silvano Ploner à fat da moderadour dla enconteda.

Micheletti, l consulent scienfich enciarié da la provinzia, à recordé en curt i vares dl percurs dla candidatura pìeda via dl 2005 y scuta ju dl 2009 a Saviglia, olache l Unesco à metù ite 9 grups dolomitics tla lista di Bens Naturai. I aspec geologics, geomorfologics y dl paesaje é de valour enorm – à splighé l architètl – les Dolomites é l plu vedl "liber dl Triassich", perchél él i creps plu studiés al mond.

L assessour ai Enc Locai Mauro Gilmozzi à auzé fora l sostegn dl assessorat y dles strutures provinciales al bon ejit dla candidatura: n laour nia saurì per



Truepa jent à tout pert a la scontreda metuda a jì da la Union Autonomista Ladina.

via dla prejenza de istituzions y de provincies desvalives, a statut ordinar y spezial – àl dit - che endere à sapù laoré polito deberieda per porté la candidatura a bon fin. Al ne é nia sté saurì ti splighé ai referenc dl Unesco che l om viv tles Dolomites da centenés de agn y ne ruina nia l ambient con sia prejenza – à desclarì ciamò l assessour - ma al encontra che l om é al zenter dl paesaje y chest ne é nia da conscidré valch de negativ. Defat se à la identité de chisc creps formé tl

ambient natural ma ala à respidlé col jì dl temp la cultura materiala y la organizazion sozjala dles popolazions: l resultat de chest prozes é n paesaje unich, caraterisé da n ecuiliber perfet anter persona y natura, che ti à dé vita a strutures economiches articoleades ma souraldut che à abù la capacità de laoré fora n "stil de vita" particular. Chesta originalité é l valour enjonté dl patrimone natural dl raion dolomitch che é vegnù reconesciù dal'Unesco, na oportunité

straordinara per se tò fora y ester competitivs. Ades l'endesfida – à dit Gilmozzi – é ti asseuré n davegnì a chest ambient tres l laour y l'economia, sostegnì n svilup che arjonje na cualité de vita auta, con investimenc culturai de valuta, turism de cualité, colegamenc asvelc y ence desferenziés, sciche Metroland, sce an vuel che la jent vive inant te chest raion ence te cincant'agn. Gilmozzi à ence rejoné dla Fondazione, l strument che messarà asseuré l'atuazion dl plan de gestion y ti dé valivanza a les cinch provincies y does regions toutes ite, con la oportunité per vigni una de manejé sie teritore.

Un di cruzies che l publich à auzé fora tl curs dla debatuda vegnuda do i referac istituzionai é la tema che l reconesciment da man dl'Unesco posse enjonté ciamò autri liams a chi che é bele tl raion dolomitch: l president dla Provinzia Lorenzo Dellai à dit che l cruzie é legitim ma che ti plans de svilup ne saràl degun liam de plu. La endesfida dles Dolomites – é jù inant Dellai – à doi paroles clef: responsabilté y competitivité. La pruma vegn ca dal spirit sedimenté dl raion, nia geologich te chest

cajo, ma cultural y identitar. La competitivité mess se empervalei di strumenc per recuperé la vueia de costruì l davegnì, idees che mess se renové aldò dl mudament di temps, ence sun i temes dla mobilté. I teritores che fajarà cernudes da coraje en cont de mobilté – à dit ciamò Dellai – arà tl davegnì n turism de cualité auta, i autri messarà se encontenté de chel che avanza.

Auter pont auzé fora é l paiament dl ticket sun i joufs: la provinzia de Trent é contrara a fé paìé per passé fora i joufs – à dit l president – ajache la esperienza à mostré che al ne resolv nia l problem, al encontra fossa la provinzia de Trent a una sun scomenciadives toutes deberieda anter les provincies.

L conseier provinczial ladin Luigi Chiocchetti se à dit content de coche la enconteda é jita, truep partezipeda da la jent, a chela che al ti é vegnù responù con clareza y prezijion. Da chesta nosta comunité de val – à dit l conseier - se speton truep en cont dla gestion dl teritore, tla convinzion che l Comun General de Fascia podarà avei na pert emportanta tl dessegné i scenars dl davegnì dla val. (cri.m)